

嘉慶松江府志

松江府志卷四十二

名宦傳

明

俞大猷字志輔泉州衛人世襲百戶嘉靖十四年武進士以討海寇功遷參將移浙東三十二年進南直隸副總兵駐金山衛始至見兵不滿三百乃權集河船上兵扼險守要防遏內突明年賊攻金山禦卻之旋將永順兵擊賊於平望又以閩兵戰六金壩皆大捷斬首三千級柘林之賊遂空而督府張經被逮功弗錄先是金山之役所部田州兵失利浙福提督李天寵論之削秩立效

已復破賊於吳松江營前沙茶山洋江南賊盡平移軍
定海滅浙寇累遷都督同知會胡宗憲用盧鏜議欲撫
王直許通市大猷固爭以爲島寇入犯坐直潛通爲奸
若聽其互市東南之禍無已後必悔之宗憲竟誘直降
及直見誅其黨潰入閩乃以逸賊爲大猷罪劾下詔獄
尋釋赴邊以功贖積遷至後軍都督府同知卒贈左都

督郭志

盧鏜汝寧衛人嘉靖時由世廕歷福建都指揮僉事擢參
將分守浙東備倭駐海鹽與松江相犄角其立功多在
浙省事具明史不錄蕭顯之偪金山也城中危迫鏜從

海道來援兵皆擁藤牌舞刀入陳大敗賊兵逐北數十
里凱歌入城衛人號爲處州藤牌手云

明史俞大猷傳參衛志

胡宗憲字汝欽績溪人嘉靖十七年進士自餘姚知縣擢
監察御史嘉靖三十四年巡按浙江會趙文華出視師
贖貨無厭宗憲有智數以術馭之文華亟上其功超擢
右僉都御史代李天寵巡撫明年遷兵部左侍郎總督
南直隸浙福二省軍務時海寇犯閩浙者王直陰爲主
而徐海與其黨陳東葉麻等分據柘林川沙陶宅別部
自海門入掠維揚瞰京口夏四月海與東合而攻乍浦
戰於阜林陷河朔軍遂乘勝圍阮鶚於桐鄉宗憲旣遣

客說下王直款定海關因厚遺謀者使諷海海陰許降
先引去東勢孤亦解圍始相疑貳宗憲乃益市德於海
令殺賊立效及上海賊西趨嘉善海果帥所部逆擊於
朱涇餘賊夜走吳松江宗憲使俞大猷遮擊之殺溺且
盡海又縛葉麻陳東以獻遂入平湖受款宗憲使自擇
便地居沈家莊與陳東餘黨隔水而處復搆令自相鬪
官軍遂四面薄之風烈縱火斬獲千四百餘人焚溺亡
算江南浙西之寇盡平浙東閩部以次翦滅累進少保
兵部尚書兼右都御史四十一年被論逮訊以功免歸
尋坐羅龍文事復下獄死萬歷閒御史朱鳳翔暴其寃

得復官賜祭葬崇禎中追諡襄敏

郭志

熊汝器字國用嘉靖進士授上虞知縣陞蘇州府同知母喪服闋補松江同知禦倭有功賜金帛條陳備倭十事略見施行轉南京吏部郎中歷官整飭寧武兵備副使

南昌縣志

侯繼高嘉靖閒金山衛指揮使數齡夢關壯穆授以三矢曰爾至性過人異日當爲國盡力後海寇作亂繼高出洋接戰斬首百餘級賊遁去

金山志

黃珏歙縣人金華司巡檢倭寇朱涇出禦陳亡

金山志

黎遵訓字孝若京山人嘉靖二十六年進士三十五年以

刑部郎中出知松江府會歲饑民失業爲寇猝抵城下者萬人遵訓登陴諭以利害皆羅拜引去已乃撫瘡痍招流亡蠲負緩徵境內以安遷雲南兵備副使

郭志

袁汝是字公儒石首人嘉靖二十九年進士除松江推官歷署縣事分九等之職立十限之法嚴告訐之弊省庫辦之繁郡有疑獄朱葵陳詔等久誣服汝是虛心研鞫得雪其冤召爲給事中以建言謫判泉州移蘇州同知擢松江知府其居官勤職持守廉介一如爲推官時

志略

倪光薦字達甫平谷人嘉靖三十五年進士除華亭知縣

時境上猶有島寇光薦撫綏安輯民甚感悅雞鳴視牘
張鐙治書凡有因革諮訪周詳權便宜略苛細次第舉
行之鎮定從容不以智術賈能幹名操守潔白道路歌
謠滿六載徵爲給事中累官至工部尚書

郭志

胡昴字文宿扶風人嘉靖中舉人任開封通判治才明敏
有妖僧某善幻形以行穢媒擒治之遷松江倅見婦人
在江上哭而不哀密察之乃繼妻潛隕前室子而詐哭
也卽逮訊置之法

陝西通志

翁大立字道生餘姚人嘉靖十六年進士先以參政督餉
蘇松三十八年擢右僉都御史巡撫應天諸郡會海寇

嘯聚三沙兵部郎中唐順之來視師因共設方略大破之奏設金山遊擊增沿海軍餉去內地冗兵并民間雜役以徽州府民丁萬六千有奇悉佐松江軍興用事平有議加賦及督逋稅者皆疏請得免常以荒政莫先水利請以工部官專司導濬時東南仗爲保障焉

郭志

邵光先字子孝長冶人嘉靖三十八年進士除上海縣深沈有才幹時運官多橫索一日率數十卒持梃露刃入縣門光先手執衛弁叱與隸盡縛其從卒趣吏具狀申督府弁恐伏地請罪乃釋之下令漕艘停泊浦濱魚貫受兌唯唯無敢譁不三日事竣四十年大水發粟勸分

計里設廠煮粥賑飢多所全活歷遷監察御史總督三

邊兵部尚書卒贈太子太保

上海志

常應文字汝實嘉靖壬辰進士任上海知縣公明仁恕甫

三月政通人和以不習水土病歸

山西通志

臧繼芳字元實長興人嘉靖三十二年進士四十年自工

部郎中出知松江府每理郡事日有規條揭屏上以次

而行從容有餘暇是歲大水請蠲賦旋請兩臺給粟煮

糜以賑之金澤盜丁彪聚衆數百販鹽湖海聞巡撫將

議勦繼芳請不用兵而諭令自歸諸脅從竟縛彪馳獻

踰年聞母喪適有事吳門立解印綬歸

郭志

耿定向字在倫黃安人嘉靖三十五年進士除行人擢監察御史出按甘肅舉劾無所私去任行笥一肩有以石經餽者留之境上作留經記四十一年督學南畿創立清涼明道二書院與所簡拔士講求實學所試經義取正大清新斥俶詭華飾秩滿貽書政府求一郡自效政府固留之復任三年隆慶初遷大理寺丞謫黃州判官移衡州萬厯中累官南京右都御史兵部尚書總督倉場力辭求退卒贈太子少保諡恭簡

明史參雲
閒志略

魯直字正卿零陵人弱冠領鄉薦除臨海教諭擢知雄縣轉判松江釐奸剔蠹清積年糧餉餘羨請佐邊儲陞臨

江郡丞

湖南通志

陳邦顏字獻祉晉江人嘉靖四十一年進士授華亭知縣縣方大水邦顏盡心撫字每至丙夜不寢或勸之少逸曰吾身逸矣如吾民何歲兌漕米故多叢奸邦顏廉得主名舉其侵耗數覈之升斗不爽盡置之法吏民驚以爲神催科不遣胥卒第出片紙手署數字傳告里長緩急如期至咨訪民情自有劄記登耗善敗無不洞曉及踐更率役合邑稱平以憂去職賻弔贈遺一無所受民懷其德與倪光薦媿美云

郭志

黃文煒字德華南城人嘉靖四十年鄉試第一明年成進

士知上海縣撫弱鋤強修廢舉墜置學田百餘畝建羣忠祠以祀死事者政教翕然體素孱弱勞瘁成疾竟不起死之日囊無餘錢學使者采公議祠之

郭志

陳懋觀字孔質長樂人嘉靖三十二年進士四十三年以給事謫松江推官攝上海縣及分行海防事持法嚴海上材官戍卒皆惴惴無敢犯先是知縣黃文煒卒官廉無以斂諸丞簿爲貨幣金治木懋觀閱牒爲經紀以足官帑曰毋污清白名尋遷南京兵部主事轉吏部文選

郎

郭志

晏仕翹字應望清江人嘉靖乙丑進士授松江府推官時

華亭學士徐階爲首輔有司過其門者輒下車晏持不

可居官以廉惠稱擢刑部主事改監察御史

江西通志

周案字元僚安福人嘉靖四十一年進士授嘉善縣調華
亭始至受詞稟事第唯諾無主張吏竊笑以爲木彊人
也一日天雨視事有老胥過堂下呼詰之以某日攝某
甲何久不至因盡摘他曹掾稽玩軌法狀數其罪予杖
荷校有差由是畏服邑賦常有例進斥勿納又罷坊長
庫子縣衙供億敬禮良善懲治奸競臺使交章薦之遷

吏部主事歷吏部左侍郎

郭志參雲
開志略

王學孔字魯卿安福人嘉靖進士授松江府推官任職二

年使者交薦丁母憂服闋赴部松人詣闕乞補原任允之考最陞刑部主事

江西通志

按舊志題名不載故附於此

朱茹字以彙瀘州人嘉靖三十二年進士四十五年由部郎出知松江府明敏沈毅磊落有大節隆慶改元學使耿定向收考四府遺童爲常州知府李幼滋所阻常童聚二三百人懷瓦礫伺其出亂擊之幼滋挫威望嫁禍松童茹力辨其非且曰松江童生當擊松江知府何有於常而學使先入幼滋言屢檄拘攝弗應董宗伯傅策自戍籍歸時相過從而徐文貞階方秉國其家奴有犯

以法懲之無所避云

雲間志略

聶廷璧字祖雍金谿人嘉靖四十四年進士知華亭縣以幹敏稱執法不畏權勢或諷之少貶曰吾不能爲繞指柔也故中丞楊豫孫夫人遇害家人告變廷璧往視熟察豫孫弟有異色鞠訊引服時以爲神左遷開州判官後累擢按察司副使

雲間志略

張友舜字堯賓衡州衛人嘉靖四十五年以貢任華亭訓導遇士有恩禮凡執贄見者必辭或強之乃受退而廉其家不甚饒終卻之家人績麻刺繡以供朝夕有乞其郡邑居閒者輒不應遷廣西全州學正轉知武宣縣以

降象州蠻徵拜南京監察御史以按察僉事致仕

郭志

林潤字若雨莆田人嘉靖三十五年進士自知縣擢御史彈鄢懋卿劾誅嚴世蕃天下快之隆慶元年自太常少卿擢右僉都御史巡撫應天諸府屬吏望風戰栗潤問民疾苦上封事十餘條以松江田賦不均吏緣作姦請設專官履畝度地以三等差次由是徵稅畫一民始享田疇之利三年卒於官

郭志

鄭元韶字善夫侯官人嘉靖四十四年以舉人除松江府同知郡民符辰子纔七歲晨出爲盜所殺亡去手釧疑賣饒者張良訟之官拷掠誣服元韶攝府事廉得博徒

鄧復七攫釧狀拘訊之覆盆得白遷刑部員外郎未任
會巡撫林潤奏請履畝均糧擢元韶爲按察僉事賜敕
駐劄松江董其役初正嘉閒土田名目數十甲乙影射
莫可鉤稽元韶博訪羣議許民首實書步積之數量其
腴瘠分上中下三鄉以定科則復請五年一編徭役著
爲令自是上中民戶一年力役可得五年休息然識者
猶謂每鄉宜分上中下三等以九等定賦核其低薄列
下等始爲無弊云

郭志參雲
閒志略

史直臣字子忠涿州人嘉靖二十六年進士三十六年授
松江同知明年擢知府時瀕年水潦倭寇猖獗民皆失

其故業直臣悉心調劑錢穀兵刑具有擘畫遷山西按

察副使

雲開志略

衷貞吉字孔安南昌人本姓哀嘉靖三十八年成進士請
改爲衷先世衛人哀駘它後也隆慶元年自南京禮部
郎中遷松江知府廉靜端慤不尚嚴察吏民畏服之僉
事鄭元韶履畝均糧貞吉佐爲規畫周悉利弊故其法
盡善獎進人才孜孜如不及識董文敏其昌於童年而
甄拔唐文恪文獻及方應選楊繼禮輩皆爲名人高新
鄭當國修隙于徐文貞階監司承風旨多所株引所在
騷然貞吉獨中立持平即有所指授不爲動以是量移

遷太僕少卿去後累遷左都御史年八十卒諡簡肅

郭志

鄭岳字峻甫長樂人隆慶二年進士除華亭知縣器局寬宏能以鎮定御紛初視事不見喜怒已而悉集胥吏懲其違謬小大各當罰皆懾息不敢肆授役均平民力不困月必再課諸生禮意周洽時稱其明敏不矜介而不矯云滿三載不遷有言於新鄭高拱者謂岳實良吏獨以不善事上官弗登薦剡乃徵入爲給事中

郭志

海瑞字汝賢瓊山人由鄉舉爲南平教諭以師儒不可屈膝獨長揖上官後入爲戶部主事切諫世宗下詔獄徐文貞階救之得不死是時瑞直聲動天下穆宗卽位奉

遺詔復其官累遷左通政三年晉僉都御史巡撫應天
諸郡行部蘇松以東南民事莫先水利而吳松江淤闕
入海道壅斥羨募工濬之旁墾熟田十萬餘畝其爲政
太抵植貧弱抑豪右嘗言井田不可復惟有亟奪富民
田不得已而限田均稅策斯下矣故一意以兼并推抑
士大夫監司蔡國熙承望風旨頗用修隙而松江尤甚
告訐蠹起瑞亦殊自悔一夕盡燔所受詞終以抑斷府
怨爲南垣論罷萬曆十三年召爲南京都察院僉都御
史掌留臺事浹歲三遷皆特簡也十五年方釐定夫甲
事以疾卒於官貧不能治喪南中士大夫醵金以斂民

罷市哭之詔贈太子少保予祭葬謚曰忠介

郭志

陳薦字君庸祁陽人隆慶五年進士授松江府推官時政尚嚴肅吏亦務峻急以獵聲望薦中正自持不吐不茹訊獄詳慎必反覆得情乃已所具爰書雖老吏莫能易監司以上有所示意弗爲徇也明允稱理官最徵拜監察御史歷任藩臬擢僉都御史巡撫雲南累遷右都御史巡撫鳳陽諸府兼理漕運初江寧諸衛歲轉松郡糧與奸蠹比而魚肉里民薦嘗欲更之及是遂改大河泗州淮安揚州高郵五衛人懷其德後仕至南京刑部尚

書

郭志

石繼芳字克肖益都人以鄉舉爲猗氏教諭擢桐城知縣
會復建青浦用才望移任桐城人上章乞留弗得肖像
祀之號曰石母到官之初方議徙治言人人殊繼芳度
道里所均以唐行鎮建邑築城濬池立官司置學校設
倉廩壇壝及市肆衢路皆先爲區畫事已而質之不愆
於素士民始服無異詞其爲政操下甚嚴聽訟善摘伏
而持法平允尤加意人才擇民間俊秀親勸之學秩滿
遷錦衣衛經歷至寧夏兵備副使哮拜反與都御史黨

馨同遇害

郭志

王叔杲字陽德永嘉人嘉靖四十一年進士歷任大名知

府萬厯元年擢按察副使飭蘇松常鎮兵備叔杲習知
兵事一日海寇以百艘至分道出擊大破之奪其舟悉
還閩越被脅人論功晉右參政治兵如故時四郡多逋
賦逮繫死者甚衆會戶部尚書殷正茂過吳門叔杲馳
白之入請得蠲數十萬無何論折徵事條六利四害甚
辨給事中石應嶽劾叔杲不任漕借以自諉論調去郭志
賈待問字學叔威縣人隆慶二年進士知陝西咸寧縣召
爲禮科給事中出知懷慶府萬厯四年移守松江自倭
亂後困於兵食待問撙節裁省除冗役冗食甚衆請發
帑金五萬代三服官墾境內閒田下其直而售之得金

三千以佐都水政務廉靜自禁垣出守盡心民事不矜
爲名高亦無愠色六年遷山西參政累官僉都御史巡
撫南贛福建甘肅陝西改操江副都御史復撫陝西累
進太子少保兵部尚書卒於官贈太子太保

郭志

胡執禮永昌衛人九歲屬文號奇童登嘉靖三十八年進
士除保寧推官遷工部主事改樞密銓曹萬厯初遷通
政累進副都御史巡撫應天時年三十有六吳下多逋
賦執禮視右族亦然曰此亦不足邪行部松江責富家
主名懸之榜以此任怨得嚴聲然執禮內行治布衾蔬
食約素若寒儒謙恭有禮忌者不得伺其過七年入爲

戶部右侍郎終總督倉場左侍郎

郭志

范守己字介儒涪川人萬厯二年進士授松江推官時賈待問爲郡博大長厚守己佐之以豈弟後守閩邦寧講求文廟禮樂守己以治聞輔之屢攝鄰郡邑所至以廉平稱遷南京刑部主事終兵部職方郎中

郭志

梁夢鼎字道立南海人舉鄉薦萬厯五年署華亭教諭日集諸生講說閒以課藝孜孜不倦爲人潔清雖脩脯弗受事母孝起居饋食如孺子門隸竊見而道之歸以教其子女擢知大庾縣士子泣別至有伏地嗚咽不能起者先是嘉靖中有許以明號知人其後則錢唐陳師武

陵丁有周皆以愛士有坊表著稱茲華亭教諭也

郭志

屠隆字長卿鄞縣人好學能詩文汪洋宏放法不足而才有餘萬厯五年成進士授潁上知縣調青浦邑故庫下值大水諸隄且潰隆徒行泥淖中督吏民修治而躬禱於神是夕大雷震雨霽水不爲災時江陵柄國有履畝之令長吏率增餘畝以阿之隆以丈出餘田仍附繫原號知府閻邦寧怒罵之隆正色曰原田譬之衣領挈之始明餘田譬之衣帶非衣不附豈可使衣自爲衣帶自爲帶乎邦寧語塞賦迄不能增賊曹卒有得盜者中兩人及婦稱冤隆陳所獲衣令婦服之斬斬如一隆曰夫

人出十指修短不能齊令盜他人衣寧能悉中體耶脫
桎梏使人陰護之則賊曹卒利婦美將夜殺兩人者而
竊婦逃矣遂抵於法隆折獄抉隱類此而仁恕不苟時
上海知縣敖選好文致人於死諸生陸明揚者爲讎家
所陷具五毒引服選拜御史去明揚弟明允籲辯於臺
司讎者懼傳致明揚青浦獄將殺之適隆夜視囚明揚
方讀書異之察其冤因申狀巡按御史請以選五年所
決獄得覆讞御史從之平反七十餘事明揚亦得白隆
後遷禮部主事中蜚語罷歸以著述自娛者二十餘年
敖選在臺中數歲引疾歸過棧道馬驚墜崖死敖氏絕

郭志

易之貞字楚衡蘄縣人萬曆七年以舉人授青浦教諭時學舍初立弟子員析自他學渙而無紀之貞整設科條躬親督課士無不率其教者

青浦志

李頤字惟貞餘干人隆慶二年進士以中書舍人拜御史出知湖州府萬曆八年遷蘇松兵備按察副使頤爲守頗用趙廣漢張子高法至是一切以寬靜爲政然吏民懾其先聲亦莫敢犯張文忠居正輔政峻下捕盜格頤曰吾必不假他盜自解得真盜乃已松郡數潦不登力言之臺使以蠲卹請得減賦發賑遷浙江參政去行李

三肩蒼頭二人觀者歎息後累官總理河道工部右侍

郎

郭志

曹詩京山人以貢生授上海縣丞清介不苟因公事入府渡申江風浪陡作舟覆溺死知縣鄧炳臨其喪見襦袴垢敝篋中僅奉金一兩炳解衣以斂人兩賢之

上海志

徐民式字檢吾浦城人萬曆八年進士除松江府推官和平愷弟刑獄無濫入爲戶部郎出知安慶府以治最徵拜南京光祿寺少卿轉通政司參議太僕寺少卿三十七年晉僉都御史巡撫應天憫役重困民疏請限田著爲令民甚德之

郭志

閻邦寧字子固原武人隆慶二年進士萬歷七年知松江府爲政持大體略煩苛待屬吏嚴峻不少假辭色居恒布衣蔬食餽遺無所受丁祭齊宿率諸生必誠必敬楊井孫殺嫂冀末減乃教諸囚越獄而已安坐於其中邦寧先知之密揭巡按提省正刑誅囹圄無虞人尤服其

先事防範

雲間志略

徐常吉字士彰武進人博學通古文詞嘉靖四十三年鄉薦萬歷初署上海教諭以師道自任凡月試首錄士無不登第爲人清介有操執常白郡宰脫人於死其人以千金報常吉怒曰多財爲患害以田宅婢僕致獄訟殺

身者衆矣胡爲載禍相贈也。麾金不受。十一年登進士。除中書舍人。擢南京戶科給事中。終按察司僉事。上海署教諭。登第自常吉始。郭志

倪凍字雨田。上虞人。萬厯二年進士。知江西安福縣。移松江府同知。簡易近民。嚴束軍弁。漕事甚辦。某御史修隙論謫。山西按察司照磨。終廣東瓊州知府。凍美丰儀。潔修自飭。性剛正。一生屢躋起而堅白砥礪。卒無改節。從子元珙。天啟二年進士。崇禎中爲御史。督江南學政。善藻鑑。以不阿執政意去官。時論美之。郭志

吳三省字省吾。洛陽人。由鄉貢爲縣令。萬厯九年遷松江

府同知督運漕者再以廉幹稱兩攝縣事治民不擾有
供蒸餅果實者叱之去布衣澣濯經旬不肉食踰六年
臺使劾之會諸孝廉計偕入都具揭憲長白其誣量移
兗州同時海防同知宜賓郝字清介如三省以入賀卒
於京郡人哀思焉

郭志參雲
問志略

羅朝國字維楨新建人萬厯十一年進士除青浦知縣縣
故澤國多水災使者督逋賦急朝國曰今無歲亦且無
民而又何賦焉縣官卽急賦奈何不急民而斃之簠楚
乎卒緩之其積荒者請捐其逋更得以錢代粟訊讞不
尚智術而剖決中情嘗有拾遺道旁奸民羅織爲盜瘐

死數人監司以委朝國盡平反之全活甚衆在縣五載蕭然如寒士亦不飭廚傳以事上官以課績高等徵爲

吏部主事累官至南京刑部尚書

郭志

李松永新人以鴻臚序班爲青浦縣丞歲大祲斗米至二百錢松運粟以食其役曰我不忍以饑隸擾瘠民也遷

交州判

青浦志

劉冠南字文光廬陵人萬厯元年鄉薦第一後謁選除知合州以采木事忤御史被劾下詔獄冠南徒步自詣京合州千餘人伏闕訟冤朝議左御史薄謫冠南松江府簡校冠南氣宇清峻論事慷慨激昂無所匿避大吏常

倚重之屬歲祲行視災傷窮鄉畢至甚有惠澤遷湖廣

黃安知縣終貴州按察副使

郭志

陳秉浩字養自湖口人萬厯十一年進士授華亭知縣初至謁文廟諸生進講或誦牛羊芻牧章秉浩歎曰今之視民焉得如牛羊然猶有芻牧之字乎卽進父老問民疾苦悉蠲革之恤重役卻羨餘廉治舞文佐訟及奸猾吏煩苛一洗歲大旱徒步禱雨躬行阡隴檢視災害又出俸錢葺學宮置田贍士表三高士墓建四賢祠葬貞女廩節婦以示風尚丁憂去官起復福建南安知縣再調華亭以疾乞改散職得湖州教授遷嘉興府推官謝

歸杜門講學不入公府豫章名賢推重之

郭志

顏洪範字仲起上虞人萬厯十一年進士除知上海縣縣徵錢穀數十萬簿書填委獄訟紛沓洪範耳受目攝口訊手判裕如也人苟識面久而不忘擿發若神其徭役均平前後罕及焉雅好文藝士所獎拔率知名常聘邑人張之象纂成縣志滿五載徵爲監察御史

郭志

劉鵠四川人萬厯十五年以貢爲華亭縣丞司糧務時漕卒素橫每議兌挾奸弁輒譁值通判攝縣懦不前鵠單騎入水次城把運長臂約曰粟米不精鵠任其咎耗逾故額請以臺綱從事皆唯唯斂退終無肆索者鵠性嚴

直無私徇民號爲神明劉後擢河南洧川知縣郭志

喻均字邦相南昌人隆慶二年進士由刑部郎中出爲處
州知府左遷杭州同知萬曆十六年擢松江府以屬縣
役賦繁重爲鉤考無藝之徵及貢稅所由溢條上十餘
事請巡撫奏蠲之尼不果行歲大水米價騰貴均下令
發倉廩貯穀散之括諸司贖緩羨餘益之又爲文以告
鄉之士大夫并檄三老閭左好義者出粟各佐其縣分
部賑貸仍設醴粥以食四方飢民而不逞之徒乘機攘
奪諭以禍福擒治其魁境內安輯均以文學飭吏治客
有投詩干謁答云於今梁國移民日不是夷門結客時

後遷副使不久被論去

郭志參雲
開志略

譚一召字敬徵大庾人萬厯八年進士授遂溪知縣調東莞臨武量移松江府同知董漕政督輓入京卻例進二千餘金初至值大水明歲大旱與知府喻均悉心籌畫惠澤甚多其攝府事則興水利停逋責蠲省煩苛侵漁蠹政皆改革焉遷南京刑部員外郎以言國本奪職天啟中追贈光祿寺少卿

郭志

許汝魁字元甫湖口人萬厯十四年進士自浙江常山知縣調上海居三載以母喪去服闋還補故職從民志也汝魁不好更張以簡靜鎮俗事無巨細片言剖紛人人

皆心折去嘗簡輿從出行郊野與細民相接周知土田
高下人戶登耗故所定踐更最善減省斗級櫃首諸役
遠近尤德之他如甃內城增敵臺築捍浦塘民不知勞
而爲利甚永秩滿遷南京吏部主事累官至南通政使

郭志

成心學無錫人以鄉舉署上海教諭德容藹如言訥訥然
若不出口而師範可法諸士傾心知縣許汝魁重其介
守深敬禮之遷浦江令有惠愛鄰郡推官中以墨大計
吏無敢庭質鉉曹者心學憤然昌言曰令以不職去有
田可耕書可讀子孫可教甘之矣假污以墨奈何復上

先人冢乎尚書乃歎曰幾爲郡司理所誤得改教歸遂

不出

郭志

李涑字源甫雩都人隆慶五年進士知寶應縣萬厯五年徵爲戶科給事中疏論張文忠居正奪情在位充冊后使不報出爲山東按察僉事轉廣西布政司參議十一年遷湖廣按察副使飭蘇松常鎮兵備丁父憂服闋還本任諸郡賦額淆亂豪猾交相隱莫得其綱目涑釐析詳覈著經賦書吳中以爲百世利尋擢右僉都御史巡撫應天以軍餉籍委兵使者主出納一無所私踰歲解職起復爲保定巡撫謝病歸郭子章常稱天下清吏始

終一轍情貌相同必以涑爲領袖云

郭志

張集義字德宜餘姚人萬厯十四年進士知華亭縣旱潦爲災請蠲賑知府令富戶自行賑濟姦民大肆搶掠集義堅明約束懲首事者騷擾遂定又設糜活飢民甚衆以憂去

華亭志

項應祥字元芝遂昌人萬厯八年進士除建陽知縣稱廉明以再遭親喪補丹陽巴二縣調華亭單舸赴任寂無知者吏民皆驚比視事取錢穀籍定其緩急條示諸鄉爲期會公私不擾賦悉辦每聽訟盈庭訊決立盡無不情法相麗常主勘勢惡論大辟聲震江南修治陂塘使

蓄洩有備旱潦不害舉卓異第一召入爲給事中疏論翼儲及請冠婚章凡七上天下想望風采遷太常少卿轉右通政三十六年進右僉都御史巡撫應天旋以病

乞歸

郭志

李楠字豫章永城人萬厯十四年進士除松江推官折獄明允無賢不肖同聲稱賢五載徵爲監察御史

雲開志略

王廷錫字君寵仁和人萬厯二十年進士授華亭知縣初至揭清慎勤三字於屏以自勵會城垣傾圯廷錫議增築高廣十之二官爲給直民不知有畚揭之苦郡守好士恤民里吏議士民相率樹幟塞門上官風聞過實衷

甲以備非常廷錫急白無他得解散後卒以修築城濠

事罷去

華亭志

燕祖召字維翰平溪衛人以鄉薦入仕萬厯十九年轉松江府同知曉暢兵事及沿海利弊軍政振舉諸惡少年販鹽行盜者皆遁迹又長於治獄判決無滯莫不折服御史按部投牒陳愬咸願屬燕使君也祖召行視海防至金山衛首整學宮濬河出先師像於深土衛庠士科名始盛性介直恥爲媵媚被彈事輿論不平改蘇州府清軍同知後起復青州府抗稅監陳增謫兩浙運司判官嘗署松江分司事風節猶矯矯云

郭志

卓鈿字邦華沙縣人萬厯十年鄉舉經魁二十年除青浦知縣時政令泯芴胥吏作奸橫甚鈿繩束無所貸而治民平恕一切聽斷傳法而止不好爲操切清苦自甘食無兼味南北運糧戶例獻錢數百緡鈿曰運則例耳彼亦例邪屏弗納他若衙前雇役以功次受給徵賦無耗羨交際無科索所省不可計民困以甦入覲還病瘁卒無貴賤老稚皆雪涕屬纊畢囊無餘錢監司賻而歸其

喪

郭志

畢自嚴字景曾淄川人萬厯二十年進士除松江府推官年少有幹才用法平允庭無留獄性狷潔常菜羹麤糲

家人至噉麥屑一日其叔布衣草屨至郵亭呼自嚴出訓之曰我有事於吳汝父使我迂道寄語汝慎自愛爲良吏語畢遂去徵刑部主事歷遷戶部尚書進太子太保致仕

明史參通志

甘士价信豐人萬曆五年進士知縣調丹陽徵爲監察御史二十年巡按蘇松爲政博大不以鷙擊爲威而鋤姦剔弊法在必行行部松江懲姦蠹有正風化功歷遷

大理寺卿贈右副都御史

郭志

李多見字子行莆田人萬曆二年進士授戶部郎中歷遷松江府知府繩右族以法惠愛窮黎惟恐不及自奉儉

約役民力作計功受直獄有罪囚哀矜衣食之儒生以
文藝謁者接見無蚤暮甫三月以前任中考功法當去
士民至累石塞城門兵備江鐸以爲民且變率兵自衛
至郡罪首事太學彭汝讓諸生蔡汝忠等多見遂行賦
棠溪吟見志其辭曰少小事姑嫜拙嬾強撐持夫子見
斥逐大義當乖離奈此乳下兒號泣牽我衣兒號旣慘
切母心亦傷悲母出與廟絕兒行欲告誰阿爺千人傑
後母稱賢姬兒慎加餐飯母子長相依棄置汝中野我
心行自知驅車難復顧惻惻中心悽讀者悲惋時陸文
定樹聲致仕里居未嘗入公署特爲多見造門又置酒

出餞起瓊州知府平黎寇有功以母老謝歸

郭志

柳希點字春沂蘭谿人萬厯八年進士以南京兵部郎中出知松江府承李多見之後簡靜和易甚得衆心省三縣供億用形家言改修衛學科第不絕以憂去起南雄知府終按察副使

郭志

徐可求字世範西安人萬厯二十年進士初知南昌江浦憂歸起補上海縣稱廉辦未嘗輕繫人獄馭胥吏甚嚴有法待士謙和不立崖異秩滿擢兵部主事累遷四川巡撫以兵變遇害贈右都御史

雲間志畧
參上海志

許維新字周翰堂邑人萬厯十七年進士自戶部郎中出

知松江府明敏廉幹政持大體下車首嚴游惰之罰使民各有職業禁毋得淫祀鬼神習白徒梃擊別衣服器用示貴賤有等由是貴游子弟陸博狎邪竝皆斂迹奴隸無履絲曳縞者風俗爲之一變維新於兵獄錢穀無不通曉吏抱牘次第待署而已然深察民隱虛懷聽受未嘗簡忽與士大夫往還必訪政事得失閭閻疾苦或論說人才文藝終不及私以城市河道久湮傭工計直使典史龐尚鴻董之覈斥侵占盡還故迹作船運土棄於隙地爲高原葬旅殯之無主者海上游徼賈壯俘島裔六十餘人欲以爲功維新譯訊之則琉球支部往貢

中山爲飄風驅至也謹其營護請使上聞踰年遣歸國
其一人死爲之封塋焉秩滿遷河南按察副使致仕尋
起補山西累遷光祿寺卿謝病歸夫啓初卽家拜戶部
侍郎予告年八十餘卒維新容止修整工詩文行書有
古法布袍蔬食家人短衣重帽去之日惟攜郡人文集
數十卷父老設生位道旁供明鏡止水以送之

郭志

朱星耀貴溪人萬曆十一年進士以松江同知署上海知
縣剔蠹除奸民知戢畏撫字良善唯恐不及遇小訟事
不卽令對簿許自和解往往化其忿爭案無留牘

竹素堂集

龐尚鴻南海人以歲貢生知宛平縣以言事謫上海典史

剛執不畏強禦知府許維新越衆委任尚鴻能盡厥職

豪右侵占立毀之莫敢抗時論竝美焉

郭志

孫鼎相字叔亨沁水人萬厯二十六年進士授松江府推官爲政平恕常戴星出入冤滯咸理能以正自持有清操爲鄉試分考官將行同年生請見敘語甚洽旣乃爲太學生居閒鼎相面發赤遽起離席曰談何及此其人慚而退後遷工部主事改兵禮吏三部郎累遷巡撫湖

廣右副都御史

郭志

顧四明字見遠利津人萬厯二十三年進士知清苑縣改松江府教授從蒼頭二人力作以自給士以摯見者悉

卻之月必課試雅善鑒裁踰年聞親疾卽挂冠請終養
知府許維新出餞於郊爲請臺使予歲俸供甘旨焉後
仕至吉安知府卒以伉直免

郭志

沈道源字淮槎嘉善人萬歷二十三年進士自樂安知縣
改松江府教授工文章尤精駢麗之作性謙抑有廉隅
出必扃戶規範甚設入爲國子監學正轉工部主事遷
吏部考功會計吏褫青浦貪令人咸快之尋病卒

郭志

蔡增譽字宏耀晉江人萬歷二十六年進士除戶部主事
常督儲胥於吳中有聲望轉員外郎郎中繼許維新爲
知府其治迹倣維新相時俗爲張弛人樂其寬大事上

官不承望風旨下亦無瀆交僚屬之賢者必以禮終始
通判劉澄之居官廉病卒增譽哭之慟爲厚賻歸其喪
所入俸錢以飾學宮賑寒士遷江西按察副使至不能
治裝轉布政司參政入賀卒於途

郭志

毛文煒字玉臺吳縣人以舉人署青浦教諭絕筐篚謝脩
脯月俸不給稱貸以繼諸生有爲姦所誣者白之又有
以徭役愆期法當坐力解卒全其家擢廣東博羅知縣

青浦志

俞思冲字似宗仁和人萬厯二十三年進士除華亭知縣
剔姦除弊洞若觀火有巨惡爲橫閭里思冲姑置不問

一日自詣投牒痛懲之其黨逃匿故宦子爲悍奴所侮
思冲令奴張蓋隨其主遊於市復有郡守故人被劫欲
强坐偷兒思冲曰焉有白日持刀攫金者乎未幾廉得
其實改坐吏民驚以爲神

華亭志

楊廷筠字仲堅仁和人萬厯二十年進士授江西安福知
縣徵爲監察御史三十一年巡視漕運又二年巡按蘇
松疏論改織綾紵蘇松不下三十萬向無額編何以供
命請悉罷止又論河工加賦蘇松常鎮四府當天下什
三焚林竭澤民豈堪此言甚剴切不報尋督學政求方
正學嫡裔在松江者復其姓捐三百金建求忠書院祀

正學衣冠其子孫奉烝嘗不絕後累官順天府丞

郭志

熊劒化字神阿豐城人萬厯二十九年進士除廣東增城知縣調華亭才識優贍審民俗所宜然後下令約束終無紛變嚴而不擾故人皆懷服平徭賦均力役爲一時最申保甲以清盜源痛懲游手及武斷刁誣治內肅然廉介自立雖寬和應物莫敢干以私初到官常書澹簡於屏牆以自助卒踐其言三載入覲考選監察御史卒於邸舍士民聞訃爲位而哭之

郭志

劉一壙字著泉南昌人萬厯十一年進士知上海縣事邑苦逋賦一壙至寬單寒而嚴豪宦積逋一清俗健訟多

網澤中遺骸爲訟端鞫得其情悉反坐強暴斂跡七保爲往來孔道民經由浦中與風濤爭命一曠疏其故道建閘以時蓄洩至今賴之秩滿內召遷兵科給事中

江西

通志參南
昌府志

李繼周字汝輔南昌人萬厯三十二年進士除上海知縣踰三載當入覲御史以瀕海歲荒請留報可三十七年御史以前例欲留之繼周辭曰海隅外吏豈有五載不見天子聽主計黜陟者遂行詣京宣言願得冷曹吏部聞之遂除刑部主事繼周以柔道致治而不爲詭隨遺愛在民去久見思後自郎中出知黃州遷四川按察副

使死蘭曾之難贈光祿寺卿

郭志

徐日久字魯人西安人由進士除上海縣舊志無傳而陳
所蘊羅列善政爲頌其略曰侯始視事推心庭戶急解
倒懸首清詭樊田限維均紳民咸利徵法云何摘比頑
悖十甲一催敲扑不累黠胥匿蹤沈沒用晦民之無良
豪暴爲最廉得其名榜揭閭閻顧名藏形近戢遠駭訟
牒旣投不先繫逮單騎微行悄覈情曖先得其情後批
其喙裝誣一清居閒亦礙晝接衣冠肅候風裁客使續
紛送迎節汰巨室息肩肆免徵派渡阻洪濤侯知豪儻
一舟十人著令爲誠舟子不操三木用械布縷之徵非

云爲市給直待收俾無留滯力爭漕額減耗去倍千三百石民蒙其惠更急請艘芟防漕獍獍畏其威故緩行邁臺不任遲反疑侯怠白簡橫飛侯竟解帶去若風馳民亦莫貸據此則日久以爭漕費爲弁所誣云

竹素堂集

尤大治字元約江陵人萬厯十六年舉人除知光州遷松江府同知所入贖鍰盡移牒充公帑歲潦潛請賑蠲而以法懲格奪者境內安輯撰有海防志若干卷

郭志

周孔教字宗尼臨川人萬厯八年進士知福清臨海二縣徵爲御史累遷右通政晉僉都御史巡撫江南時遣中使征權行旅苦之又河道總督請加賦江南戶部建議

漕折徑輸邊鎮孔教皆上疏極言其害得罷免三十六年大水殺稼孔教條上荒政二十三事一緩征一緩解一弛權又具奏請改折漕米百五十萬內庫數十萬留權稅及事例漁課諸銀二十餘萬行賑焉初奏上未報孔教先發倉濟貸首禁閉糴括公帑羨金遣幹吏至豫章荆湘閒市粟方舟相繼米價頓平又割俸作糜粥設立廠舍擇屬吏計口散給民忘其飢後進右副都御史總理河道士民號呼借留章上不報

郭志

劉永清浦縣人萬厯三十四年授青浦訓導進諸生講經課藝寒暑忘疲踰年意有不屑欲棄官去知縣韓原善

勉留之永清潛艤舟郊外日旣暝賦詩見志登舟而去

時稱其高尚

青浦志

聶紹昌字繩之富順人萬厯三十五年進士知華亭縣會
踐更之期覈上戶詭名隱匿田六十餘萬於是中產得
免重役而力征亦不及搢紳徵拜監察御史巡按陝西

卒於官

郭志

張九德字咸仲慈谿人萬厯二十九年進士三十六年以
刑部郎中出知松江府時方大禔斗粟百錢九德詰朝
視事日晏忘餐躬履郊野詢民疾苦還定而安集之暇
則禮接士大夫款款諄諄各罄其所欲陳將以治平第

一徵會臥病爲屬吏奸胥所誤去官士論惜之

雲間志略

韓原善字繼之盧龍人萬厯二十五年進士授青浦縣持躬莊慎盛暑退食必衣冠縣多水患是歲益劇原善請蠲賑平糶設糜粥曰救荒如治兵非特用威難用恩亦不易其散粟也在鄉令民坐田塍間隨舟散給之人城令列坐城上隨人唱給之煮粥躬親調和飢民咸沾實惠復散錢以資耕者除博徒及訟師擒無賴惡少年立斃之曰盜源在是也請於上官械漕卒之橫者於常平倉前減耗過半調長洲入爲戶部主事

青浦志

王思任字季重山陰人萬厯二十三年進士觀政刑部授

青浦知縣思任於催科編審聽訟犁然秩然吏不得緣爲奸暇則詩文自娛留意人才請廣科舉及入學額督學因建議上聞逾年以事去尋起九江僉事未赴江寧破馬士英遁至紹興思任上疏數其罪請斬首傳示各直省又與書士英痛斥之魯王監國累擢至禮部尚書師潰走入山中以死

青浦志

鄧炳字其文監利人萬厯八年進士授上海令剖決如流邑瀕海隅颶風作水溢民居炳全活甚衆性尤憐才禮士多所識拔厯任常熟長興擢戶部郎有鹽商以千金

請峻拒之

湖廣通志

詹思虞字澹源常山人進士萬厯十七年由刑部郎中出爲松江知府屬邑多盜思虞廉得主名出不意發卒掩捕獲其魁盜屏蹟歲稔縣徵糧米不中程式漕弁持之急爲請改折嘗憫逋賦日增上書臺使言吏畏考成民苦敲扑考成愈嚴敲扑愈苦欲民紓敲扑先當爲吏寬考成時以爲本論擢山東按察副使去

陳志

吳之甲字元秉臨川人萬厯二十八年進士除松江推官清白自厲讞獄守正不阿嘗攝縣事綜覈錢穀勒爲成書又著兌軍條例折橫索者分考南省稱得人後陞工部主事瀕行署中無長物惟無底甕折足鐫殘書數卷

而已繼之甲爲推官者天啟中長興王繼廉亦以清慎

聞

陳志參修
雲間志略

胡公胄字問敬歸安人思泉先生孫也萬曆四十一年進士官松江教授樂育人材保全士類忤學使意掛冠去

雲間
雜誌

張應登字顯卿丹陽人以貢授青浦訓導動止端方不妄言笑或投暮夜金乞書致縣令立謝之課士多所成就

青浦

志

章允儒字珍甫南昌人萬曆四年進士授華亭縣知縣時軍興詔天下計畝加賦華亭歲額六十萬加至七十餘

萬允儒檢成賦可省可抵者先後免三萬七千餘兩有
武弁鳩殺同官弁强有力且善辯或曰職官當從減允
儒曰大辟無可贖之法千戶無議貴之條竟擬如律邑
之金家街有橫尸一老者哭曰吾子也愬之官賊弗得
或榜片紙道旁曰薛某殺人又從薛所得死者所弄二
錢允儒疑之詣其地審視良久曰得之矣縛市樓一挑
達子鞠之立服蓋死者爲變童誘狎不遂因殺之而弄
錢嫁禍也諸發奸摘伏類此徵拜吏科給事中忤魏忠
賢奪職崇禎初復故官尋以廷推忤溫體仁罷去南昌府志
賀仲軾字景瞻獲嘉人萬厯三十八年進士授青浦知縣

視事左右卻立屏息無一人敢近者督賦不煩編審有
法民皆頌之擢刑部主事歷武德兵備副使崇禎十七
年闖寇逼納款登樓自縊死妻王妾李張從之乾隆四
十年

予諡節愍

欽定勝朝殉節諸臣錄參青浦志

鮑奇模字赤城餘杭人萬厯二十三年進士授青浦知縣
盡心民事時徭役每有舍富差貧之患奇模先於編審
時按產定爲甲乙不令里胥意爲高下催科寬期會不
事敲扑而賦自集日食鮭菜未嘗以供具累列肆也禁
約積蠹聚賭私鬪法在必行而橋梁之便民學官之造

士率捐廉以倡成之

青浦志

徐尚勲字未孩德清人天啓二年進士除青浦知縣四年縣大火尚勲力請改折民賴之五年調知華亭擢監察

御史

青浦志

梁允玳懷集人萬厯七年由明經任上海丞到官日卻糧長贄見銀八百兩隨陳一切運糧赴京陋規竝華亭青浦三邑弊困列款於直指使者前因旱裁減歲節省數千金會以憂歸決志養母不復仕進

廣西通志

張文炫字士韜安邱人萬厯二十六年進士知長垣縣遷南京戶部主事轉刑部郎中四十年出爲松江知府忠

信慈惠與民休息遇豪強執法凜然不可犯民有湯某
字女於莊爲養媳年及笄而莊困於貧計賣豪家兩月
矣湯訟之官爲鉤攝其女并呼莊子至捐廉俸置辦衣
巾令成婚昇還其寓觀者摩擊未幾衛卒以請糧幾閔
文煙調劑得宜遂解散擢陝西按察副使

雲間志略

楊鶴字修齡武陵人萬厯三十二年進士厯監察御史出
督兩浙鹽法下車問疾苦松江場所凡六獨袁浦戶丁
倍諸場蕩產破家十不存一鶴均派袁浦戶丁於六場
課減十之六又檄崇明天賜場之加額補助六場而六
場增額又減十之五大司農知鶴肇畫艱難疏上報可

又奏免諸司商稅刷清豪石侵占兩越三吳咸被其澤
累遷兵部尚書太子少保敘功追加太子少傅

明史參雲間志

略

方應明字昭伯光州人萬厯三十二年進士厯知壺關洪
洞四十年遷松江同知江南五郡民走三千里轉粟二
十一萬四千八百石而松江獨轉粟四萬餘石轄五十
八艘應明慷慨受事曰劉度支嘗歲運百一萬石矣李
鄴侯嘗歲運百三十萬矣彼獨非臣子耶而我何漕之
不可爲惟清弊端塞弊孔始稱便耳其便於家也水腳
之費常例之入毫不染指其便於途也軍不虐民關無

苛稅其便於至京也倉場誅求無厭挺身先之交納速而折耗輕著漕運要略凡意不能盡言言不能盡意者悉筆之於書後遷寧波知府擢嘉禾兵備又有所著心問皆名言文章絕類管荀云

雲間志略

劉之待字世聘興國州人萬歷四十四年進士除松江推官時松江多闕員凡攝縣篆者三攝府篆者再兼海防諸曹無虛日期會不煩而訟囂自息兩衡文柄翕然有知人之譽吏部奏治平最居天下第二擢監察御史裏

行

雲間志略

張鳳翔字覽之山西偏頭右衛老營人以貢分刺登州萬

歷四十六年服除補松江通判職專漕運不旬日首途
受事計盈虧驗美惡不假胥吏耳目一切公費卻不納
卽賦長常例亦不敢進舟次清河白蓮賊徐鴻儒發難
鄒滕綿亘青濟榜人多烏合衆乘亂煽惑鳳翔諭之以
大義且教以坐作進退疾徐之法用是保護國儲無升
合損敘勞績攝海防同知巡行海上察武弁之不職汰
士卒之老弱覈糧餉之侵蝕三政成而瀟瀟聽理之命
下鳳翔一清如水歸程五千里不知所措知府張宗衡
贈金百五十始得束裝行

雲間志略

張宗衡字梁山臨清人萬歷四十一年進士天啓二年自

大理寺正擢知松江府強毅有幹略湖州盜葉朗生既誅其黨馬文元有邪術潛逸至郡羣不逞轉相護匿宗衡知賊曹卒周忠素善文元許以不次賞忠遂誘執以獻伏法忠故藏納亡命尋亦被收繫瘐死又嘗微服夜行遇偷兒輒自擒縛飲博無賴或破壁求之道路屏息秩滿遷按察副使累擢總督宣大都御史崇禎十五年里居佐有司守城

大兵破臨清死之

予謚節愍

欽頒殉節諸臣錄參郭志

鄭友元字其山京山人天啓元年進士除青浦知縣崇禎

初調知華亭兩縣故稱繁劇友元口酬手批判決如流
催輸有法刑罰不加而課畢登踐更之期里胥多詭匿
友元鉤得其實任役者輕重若懸衡三年分校南省陳
子龍出其門又設義學於求忠書院郡人士翕然崇尚
古學其振興之功爲多徵拜監察御史以逋青浦金花
銀二千九百與給事中周瑞豹熊開元竝貶二秩不就
寄居小蒸久之歸楚不仕終

明史參通
志青浦志

方岳貢字四長穀城人天啓二年進士授戶部主事進郎
中歷典倉庫督永平糧儲崇禎元年出知松江知府明
敏強記案牘過目不忘謝絕饋問罷諸徵索廉能之譽

騰於遠邇郡東南臨大海颶潮衝擊爲民患築石隄二
十里許以捍之郡漕數十萬石而諸倉乃相距五里乃
築城垣護之名倉城他若救荒助役修學課士咸有成
績舉卓異者再會薛國觀敗其私人上海王陞彥下吏
與岳貢素有卻誣以餽國觀金三千被逮士民詣闕訟
寃巡撫王希亦白其誣下法司獻奏無實跡復官擢山
東副使兼右參議總理江南糧儲超拜左副都御史兼
東閣大學士故事閣臣無帶都御史銜自岳貢始十七
年李自成陷京師被執幽劉宗敏所不屈縊死

明史參
通志

殷革星子人由監生歷官知松江府清慎自守政聲大著

母喪服闋知南雄府時梅嶺險峻行者艱阻乃募民疏

鑿通道至今便之

江西通志

按顧陳郭三志知府題名表皆無考此傳又不載年月無可編次姑附於此

楊泰初隆德人松江府通判後歸里崇禎六年賊陷城與

子生員善俱赴井死乾隆四十年

予謚節愍

欽定殉節諸臣錄

胡獻來寧海人崇禎元年進士以行人選授海防同知清介絕世隨一蒼頭到官布袍蔬食晏如也青浦役法久敝臺使聞其賢特以委之獻來差次戶產劑量均平垢習一洗有富室當役太倉某給事其密戚也馳至縣力

爲營免竟弗得旋攝縣事輸賦之羨悉以當正供民有
愬訟曲直立剖未嘗靡一錢受代還府縣人皆涕泣奔
送歲餘遷兵部員外郎後數年有於潛趙元會亦稱廉

幹

郭志

凌義渠字駿甫烏程人天啓五年進士除行人崇禎三年
擢禮科給事中與溫體仁同里無所附麗多建白後其
語皆驗出爲蘇松兵備以清操著吳俗好訟多詐義渠
每以片言折之人服其明歷山東右布政使召拜南京
光祿寺卿轉大理卿十七年賊陷都城作書辭父絕吭
而死年五十二贈刑部尚書諡忠清

國朝賜諡忠介

明史參通志

馮元颺字爾馨慈谿人崇禎元年進士授都水司主事中官張彝憲總理戶工二部事元颺抗疏謂內臣當別立公署帝責以沽名請告歸尋起禮部主事歷郎中遷蘇松兵備參議溫體仁當國唐世濟爲都御史皆烏程人其鄉人盜太湖以兩家爲奧主元颺捕其魁則世濟族子也置之法又選材官募勇士別設一營號中權軍威大振遷福建提學副使謫山東鹽運判官攝濟寧兵備改天津擢右僉都御史巡撫天津兼督遼餉京城陷由

海道歸卒

明史參通志

李瑞和字寶弓漳浦人崇禎七年進士授松江推官其爲治蕩滌煩苛簡易近民時知府方岳貢政尚嚴肅瑞和劑之以寬常言吏道去泰甚焉用多設科條然其才識明敏人亦莫能眩也初漕運愆期議以推官督兌瑞和請於督撫得以軍法從事弁卒奉約束惟謹踐更者不困其攝縣時催科不擾有去後思在郡七年徵拜監察御史

郭志

麥而炫字章淵高明人崇禎四年進士除上海知縣歲旱率吏民步禱有龍見於龍華兩立至明年春麥秀兩歧有虎暴旋卽遁去坐事免百姓罷市詣臺乞留而炫固

辭始聽去繪圖四以紀德政龍見甘雨岐麥虎渡河也
後知安肅歸唐王立起監察御史順治二年死節乾隆
四十年

予諡節愍

上海志

彭長宜字申伯海鹽人崇禎十六年進士除上海知縣科
條簡易而摘發中隱微舞文者駭愕斂手先是巨室僮
奴聚黨劫主繼以焚掠撫軍擒斬數輩旣定而修怨者
日捕日衆長宜以爲首惡旣誅宜停追攝全活者數百
家且撤巡按兵戍川沙者尋有愚民相聚立教至數千
人督撫將加之兵長宜固爭得免其徵賦悉省羨入不

施鞭扑第令速輸知府讓之謝曰與其督卒而飽吏橐不如寬之使悉入公家民貧鬻子女以償官何忍敲扑以博最也民間益感悅賦登踰他縣夏亢旱徧行村落恤災傷請減稅額十一家去治所二百里月載酒米自給曰惟市鮭菜倍其價以償至汲水者亦給以直明亡自經爲學博陶鑄解免

大兵下浙江不食死

上海志

楊文驄字龍友貴陽人萬厯四十六年舉人崇禎七年授華亭縣教諭好推獎士類建養賢堂與諸生論文角藝於其中有貧而好學者輒傾囊餽給之時輕騎出郭外

擊劍校射務爲有用學遷江寧知縣御史詹兆恒劾之
奪官福王立起兵部主事歷兵備副使右僉都御史巡
撫駐京口甘露寺之潰文聰走蘇州

大兵至不能禦退至浦城爲追騎所獲不降被戮著有金

水移等集

明史參
華亭志

黃某浦東場鹽大使金山衛城破縊死

金山志

眭明永字嵩年丹陽人崇禎十五年舉人授華亭教諭乙

酉城破題詩明倫堂壁曰明命不永嵩祝何年生忝祖

父死依聖賢遂自經不死出投泮池被執不屈死

華亭志

侯承祖字懷玉世襲衛指揮使父繼高鎮定海禦倭寇有

功承祖忠勇多才略乙酉南京失守總兵吳志葵黃蜚
與松郡紳士沈猶龍李待問章簡相爲犄角承祖守金
山吳黃兵敗黃浦松城破猶龍待問簡俱死之

大兵攻金山承祖堅守鏖戰三日夜衛城藤牌兵最驍捷
戰死者四百餘人有從水關接

大兵者城破承祖巷戰馬蹶被獲擁入郡說之降不從南
嚮立就義華亭學前都督李成棟歎曰江南自史閣部
而下承祖一人而已乾隆四十一年

賜諡忠烈

陳大綬初授指揮年老乞休衛城破悉驅家人入水持大

木擊之溺竟乃隨入焉予元爵字首階夫婦俱死同城
指揮使施恩西天黑徐可大鎮撫寶邦翰朱秉正千戶
馮舜卿寶世勳百戶邱應元阮國柱江百騰徐君啟徐
君寵陸君球徐雙槐郭宗盤等後先殉難者凡三十六
人

金山
衛志

張明道金山衛百戶所百戶衛城破合門一十八人俱殉

節

金山
衛志

濮寅金山衛前所百戶勇敢善謀南都失守衛城集衆會
議寅曰受國家三百年厚恩以身報國正在今日何必
多言遂與侯承祖定計固守同列不能相睦寅適巡視

城垣仇者突出刺之弟臨聞難奔赴亦遇害妻常氏自縊死妾張氏負幼子逃出從弟庠生靖修城破合家焚

死武舉卜宇亦縊死

金山衛志

廖應世字敬梅世襲金山衛指揮千戶德慶侯裔衛城困悉力堅守城下積尸與雉堞等兵隨躍上應世手刃數人與其長子某皆自刎死次子某焚其親屬二十餘人還自刎父尸旁是時闔門殉難名多失傳其可考者若少梅可賢可才可能四人

金山衛志